

四庫全書

集部

欽定四庫全書

後村集卷十八

宋 劉克莊 撰

詩話下

楊劉諸人師李義山可也又師唐彥謙唐詩雖雕斲對  
偶然求如一杯三尺之聯惜不多見五言叙亂離云不  
見泥函谷俄驚火建章剪茅行殿濕伐柏舊陵香語猶  
渾成未甚破碎若西崑酬倡集對偶字面雖工而佳句  
可錄者殊少宜為歐公之所厭也

王元之被遇熙陵知制誥因救徐鉉貶商州為內相因議孝章后喪貶滁州真皇登極召還將用矣其詩乃云兩制舊臣生白髮一番新貴上青天未幾再謫黃州遷蘄州而卒豈新貴有所未平乎

王元之挽趙中令云太常草儀注全似葬周公足以稱其勛業

魏野五言云常憐李斯首不及嚴光足真處士語也潘闥云白日昇天易清朝取士難野聘名而不至闥叫呼

而求用味其詩與張元姚嗣宗何異

潘閨客舍詩土牀安枕穩紙被轉身鳴定非慵便枕玉涼繡被春寒夜者所能道也

詩家評論古人多是書生空言爾晏元獻書平津侯傳云主父仲舒容不得未知賓閣是何人公能客富歐二公於門下然後可以為此言但主父非仲舒之倫宜以汲黯代之

夏英公宮詞云絳唇不敢深深注却怕香脂污玉簫不

減香奩花間之作王岐公夫人閤端午帖子云後苑尋  
春趁午前歸來競鬪玉欄邊袖中獨有香芸草畱與君  
王辟蠹編出新意於綵絲巧粽之外可喜也

將飛更作迴風舞已落猶成半面妝宋景文落花詩也  
為世所稱然李義山固云落時猶自舞掃後更聞香李  
下句尤妙

君謨以詩寄歐公公荅云先朝楊劉風采聳動天下至  
今使人傾想世謂公尤惡楊劉之作而其言如此豈公

特惡其碑板奏疏磔裂古文為偶儷者其詩之精工律切者自不可廢歟

又云近時蘇梅二窮士爾主張風雅人士歸之自二窮人死文士滿朝而使斯道寂然中絕每念此事竊嘆乃知文士滿朝而詩道寂然不但近歲祖宗盛時固已然矣歐帖在鄭子敬左司家

歐公詩如昌黎不當以詩論本朝詩惟宛陵為開山祖師宛陵出然後桑濮之哇淫稍熄風雅之氣脉復續其

功不在歐尹下世之學梅詩者率以為淡集中如葑上

春田闢蘆中走吏參

烏程

海貨通閭市漁歌入縣樓

餘姚

白水照茅屋清風生稻花

霜落熊升樹林空鹿飲

溪河漢微分練星辰淡布螢 每令夫結友不為子

求官

挽齊國長公主

山形無地接寺界與波分

金山

山風來虎

嘯江雨過龍腥之類殊不草草蓋逐字逐句銖銖而較者決不足為大家數而前輩號大家數者亦未嘗不留意於句律也

蘇子美歌行雄放於聖俞昂藏不羈如其為人及蟠屈  
為吳體則極平夷妥帖絕句云別院深深夏簟清石榴  
開遍透簾明樹陰滿地日卓午夢覺流鶯時一聲又云  
春陰垂野草青青時有幽花一樹明晚泊孤舟古祠下  
滿川風雨看潮生極似韋蘇州垂虹亭觀中秋月云佛  
氏解為銀色界仙家多住玉華宮極工而世惟咏其上  
一盪金餅彩虹之句何也山蟬帶響穿疎戶野蔓蟠青  
入破窻亦佳句



金史曰... 卷十八  
子美送李生云李生以病廢東入徂徠峯志氣尚突兀  
形骸已龍鍾男兒生世間有如絕壑松悞為風雷傷不  
與匠石逢哀哉千尺幹摧朽似秋蓬此詩悲壯之甚李  
生何如人足以當之竊意子美自謂也

雁湖注半山歸腸一夜繞鍾山之句引韓昌黎詩腸胃  
繞萬象非也孫堅母懷妊堅夢腸出繞吳閭門半山本  
此見吳志和王賢良龜詩云世論妄以蟲疑冰注雖引  
莊子但出處無疑字意公別有所本後讀盧鴻嵩山十

志有疑冰之語又唐彥謙中秋詩云露淨不容玄豹隱  
冰寒却恐夏蟲疑乃知唐人已屢用之矣

半山挽裕陵云玉暗蛟龍蟄金寒雁鶩飛挽吳春卿云  
曲突非無驗方穿有不行鍊字斷對無遺巧

劉原父咏春草云春草綿綿不可名水邊原上亂抽榮  
似嫌車馬繁華處纔入城門便不生貢父絕句云青苔  
滿地初晴後綠樹無人晝夢餘惟有南風舊相識選開  
門戶又翻書皆有元和意度不似本朝人詩

劉貢父咏史云自古邊功緣底事多因嬖倖欲封侯不  
如直與黃金印惜取沙場萬髑髏往往指王韶及李憲  
輩

唐人曹松亦云憑君莫話封侯事一將功成萬骨枯  
王逢原暑旱苦熱云清風無力屠得熱落日著翅飛上  
山人固已懼江海竭天豈不惜河漢乾崑崙之高有積  
雪蓬萊之遠常遺寒不能手提天下往何忍身去遊其  
間其骨氣老蒼識度高遠如此豈得不為荆公所推

富公由并州入相外廷至於舉笏相賀王逢原獨云要  
須待見成堯舜未敢輕浮作頌聲所見高於石徂徠一  
等矣荅孫莘老云生無人媿寧非樂死有天知豈待名  
其固窮自守亦士之高致也

王逢原聞雁云萬里波濤九秋後五更風雨一燈旁不  
待著雁字而題見矣

滕白題汶川村舍云種茶巖接紅霞塢灌稻泉生白石  
根皤腹老翁頭似雪海棠花底戲兒孫可入圖畫

坡詩略如昌黎有汗漫者有典嚴者有麗縟者有簡淡者翁張開闔千變萬態蓋自以其氣魄力量為之然非本色也它人無許大氣魄力量恐不可學和陶之作如海東青西極馬一瞬千里了不為韻束縛

陳洙書御史臺壁云清朝無事諫章疎竊祿經年卧直廬惆悵平生不如夢春來三度到溪居與荆公三年衣染禁城塵撫事茫然愧古人明月滄波江萬頃扁舟長載夢中身之作暗合

唐子西諸文皆高不獨詩也其出稍晚使及坡門當不在秦晁之下集中有聞坡貶惠州詩云元氣脫形數運動天地內東坡未離人豈比元氣大天地不能容伸舒輒有礙低頭不能仰閉口焉敢效東坡坦率老局促應難耐何當與道俱逍遙天地外此詩甚佳狀得出

硯田無惡歲酒國有長春草木疑靈藥漁樵或異人花開不旋踵草薶復齊腰團扇侵時令方書遣畫長問學兼儒釋交游半士農國計中宵切家書隔歲通關河先

壟遠天地小臣孤山靜似太古日長如小年皆唐子西  
惠州詩也曲盡南州景物略無遷謫悲酸之態七言如  
身雜蚤中誰是我食除蛇外總隨鄉驥子能吟青玉案  
木蘭堪戰黑山頭亦甚工

後人取前作翻騰勘辨有工於前作者唐子西過田橫  
墓云滄溟無際何妨死却死東郊未耿光乃反退之祭  
文之意此詩必有謂不獨為橫發

元祐後詩人迭起一種則波瀾富而句律疎一種則煨

煉精而情性遠要之不出蘇黃二體而已及簡齋出始以老杜為師墨梅之類尚是少作建炎以後避地湖嶠行路萬里詩益奇壯元日云後飲屠蘇驚已老長乘舴艋竟安歸除夕云多事鬢毛隨節換盡情燈火向人明

記宣靖事云東南鬼火成何事終待邊烽作諍臣

謂方臘不

能為患直待北兵耳

岳陽樓云登臨吳蜀橫分地徙倚湖山欲暮

時又云乾坤萬事集雙鬢臣子一謫今五年聞德音云自古安危闕政事隨時憂喜到漁樵五言云泊舟華容



縣湖水終夜明淒然不能寐左右菰蒲聲窮途事多違  
勝處心亦驚三更螢火鬧萬里天河橫腐儒憂平世况  
復值甲兵終然無寸策白髮滿頭生造次不忘憂愛以  
簡嚴掃繁縟以雄渾代尖巧第其品格故當在諸家之  
上

徐師川聞捷云時時傳破敵日日問脩門又云諸公宜  
努力荆棘已千村陳簡齋感事云風斷黃龍府雲移白  
鷺洲菊花紛四野作意為誰秋頗逼老杜

宣靖之禍自滅遼取燕始韓子蒼挽中山韓帥云金絮盟猶在灰釘事已新語妙而意婉上句指韓下句指童蔡作詩法當如此

崔德符詩幽麗高遠了不蹈襲蓋用功最深者觀魚云小魚喜親人可釣亦可網大魚自有神隱見誰能量老禪雖無心施食不肯嘗時於千尋底霍見如龍章桃花云如何一朽株孕此千億花雖云行且闌明歲亦再華豈如世上人一老不復佳過湖云誰見詩顛顛發時鄙

陽湖裏月明知無人為覓昭華管自捲秋蘆片葉吹皆  
精詣可吟諷

江端友字子我鄰幾之孫靖康間以布衣名用同時詩  
人感慨北狩南渡之作多矣子我云楚欲圖周鼎湯猶  
繫夏臺又云比年熒惑犯南斗何日燕人祭北門事的  
切而語回互

江子我咏象云倉舒只用兒童計亦自能知爾重輕蓋  
用王內翰元之譏玩張相齊賢之語但含蓄而不刻露

爾

朱希真七言如幾許少年春欲夏一番夢事綠催紅過  
時不語鶯解事怕客深藏魚見機人間萬事老無味天  
下四時秋最悲五言如翦茅編鶴屋節米聚雞糧燈昏  
鼠窺硯雨急犬穿籬皆警策不蹈襲

前輩記朱新仲舍人天氣未佳宜且住風濤如此亦安  
歸之睨取其自然不煩斲削然新仲此等句尚多如招  
郭侯飲云此時老子興不淺旦日將軍幸早臨如何以

報之青玉案我姑酌彼黃金壘凡引用前人語皆蟠屈  
排奐使之妥帖他句如滿地落花春病酒一簾明月夜  
登樓相親多謝風標子可欵豈無瀟洒侯何從可覓秋  
消息忽有先鋒到白頭如水篆行科斗林幽囀畫眉若  
不經思而俱出人意表讀杜詩云縱之逼論劍收之入  
檀弓尤前人所未發也

劉屏山題李忠愍集云二帝蒙塵方幸塞六臣奉壘更  
朝梁叙當時事忠憤悲壯尹少稷聞魏齊入寇云酬功

不惜賞千布送死惟堪縛一驢足與前句相上下

先朝上元駕御端門示與民同樂之意而已宣和間燈  
尤盛至於騎年連月警蹕夜出尹少稷靖康元夕詩云  
景龍只是當時路不見金錢打著人劉屏山亦云淒涼  
但有雲頭見曾照當時步輦歸皆記向來期門之事

汴都角妓部六李師師多見前輩雜記部即蔡奴也元  
豐中命待詔崔白圖其貌入禁中師師著名宣和入至  
掖庭頃見鄭左司子敬云汪端明家有李師師傳欲借

抄不果劉屏山詩云輦轂繁華事可傷師師垂老過湖  
湘縷衣檀板無顏色一曲當年動帝王亦前人感慨杜  
秋娘梨園弟子之類

茶山種竹云餘子不足數此君何可無上句雖非竹事  
不覺牽強荔枝云絕知高韻傾珎柱未覺豐肌病玉環  
上下句皆切又妙於融化送別云不堪相背處何況獨  
歸時行役云一寸客亭燭數聲村舍雞絕似唐人

紹興初金歸我河南識者知和約之不堅又錢氏之後

自中原遷奉三世喪柩窆於越上諸公皆為哀挽茶山  
獨云摸金千騎去埋玉幾人歸可謂妙於用事余為袁  
守項容孫被召過袁自言其先世墳城在沙寺者皆已  
遷葬公安國愈感矣士大夫得無感慨乎

王嘉叟侍郎柳色知春淺鐘聲覺寺深避虎連村靜分  
魚一市腥之句甚佳

初以鹽鈔僧牒糴軍儲夏均父詩云坐食今添幾支遁  
煮鹽那得百弘羊反本之論也



士大夫當離亂時有幸有不幸者簡齋云浮世身難料  
危途計易非東萊云後死翻為累偷生未有期誦之皆  
可悲慨

趙忠簡當國以近臣薦起處士劉致中至則趙去秦代  
之矣劉報罷歸尹少稷柬之云徒然五侍從不辦一書  
生史相力薦放翁賜第其去國自是臺評然王景文乃  
云直翁自了平生事不了山陰陸務觀放翁見詩亦笑  
云我字務觀乃去聲如何把作平聲押了

陸放翁少時調官臨安得句云小樓一夜聽春雨深巷  
明朝賣杏花傳入禁中思陵稱賞由是知名

古人好對偶被放翁用盡 箝紙尾摸牀稜 烈士壯

心狂奴故態 生希李廣名飛將死慕劉伶贈醉侯

下澤乘車上方請劍 酒寧剩欠尋常債劍不虛施細

碎仇 空虛腹壘塊胃 愛山入骨髓嗜酒在膏肓

手版肩輿 鬼子天公 貴人自作宣明面老子曾聞

正始音 牀頭周易架上漢書 溫卷熱官 醉學究

病維摩 無事飲不平鳴 乞米帖借車詩 麴道士

楮先生 土偶天公 長劔挂頤短衣掩脛 已得丹

換骨肯求香返魂 子午谷丁卯橋 洛陽二頃光範

三書 酒聖錢愚 茶七益稷三升 一彈指三折肱

天女散花麻姑擲米 玉麈尾金裹蹄 虎頭雞肋

金鴉背玉轆轤 客至難令三握髮佛來僅可小低頭

百衲琴雙鈎帖 藏經閣帖 維摩病說法虞卿窮

著書 讀書十紙上樹千回 風漢醉侯 見虎猶攘

臂逢狐肯叩頭 天愛酒地理憂 一齒落二毛侵

痴頑老矍鑠翁 曲肱縱理 竹郎木客 百錢掛杖

一鋪隨身 百甕齏兩困棗 鍊炭勞薪 銅臭飯香

記書身大似椰子忍事塵生如瓠壺 笑爾輩愛吾廬

僧坐夏士防秋 塵尾清談蠅頭細字 巖下電霧

中花 唐夾寨楚成臯 劍南集八十五卷八千五百

首別集七卷不預焉似此者不可殫舉姑記一二於此  
近歲詩人雜博者堆隊仗空疎者窟材料出竒者費搜

索縛律者少變化惟放翁記問足以貫通力量足以驅使才思足以發越氣魄足以陵暴南渡而後故當為一大宗末年云客從謝事歸時散詩到無人愛處工又云外物不移方是學俗人猶愛未為詩則皮毛落盡矣

舊讀楊誠齋絕句云飽喜饑嗔笑殺儂鳳皇未必勝狙公幸逃暮四朝三外猶在桐花竹實中不曉所謂晚始悟其微意此是江東漕奉祠歸之作也鳳雖不聽命於狙公然猶待桐花竹實而飽以花實况祠廩也欲併祠

廩掃空之爾未幾遂請掛冠

誠齋挽張魏公云出晝民猶望迴軍敵尚疑只十個字  
而道盡魏公一生其得人心且為敵所畏與夫罷相解  
都督時事皆在裏許然讀者都草草看了

今人不能道語被誠齋道盡 宿草春風又新阡去歲  
無 江水夜韶樂海棠春貴妃 橘中招綺夏瓜處屏

休文

東宮  
生日

晉殿吳宮猶碧草王亭謝館儘黃鸝 春

歸便肯平平過須做桐花一信寒 東風染得千紅紫

曾有西風半點香 年年不帶看花眼不是愁中即病

中 昇平不在簫韶裏只在諸村打稻聲 六朝未可

輕嘲謗王謝諸賢不偶然 山根玉泉仰面飛飛出山

頂却下馳自從廬阜瀉雙練至今銀灣乾兩支雷聲驚

裂龍伯眼雪點濺濕姮娥衣寄言蘇二李十二莫愁瀑

布無新詩

題漱玉亭

羲和夢破欲啟行紫金畢逋啼一聲

聲從天上落人世千村萬落雞爭鳴素娥西征未歸

去簸弄銀盤浣風露一九玉彈東飛來打落桂林雪

毛兔誰將紅錦幕半天赤光絳氣貫山川須臾却駕

丹砂轂推上寒空輾蒼玉詩翁已行十里強羲和早

起道無雙

義娥  
謠

子雲到老不曉事不信人間有許

由

釣  
臺

放翁學力也似杜甫誠齋天分也似李白

放翁云胆薄沽官釀昏讀監書杜荀鶴詩欺春只愛

和醅酒諱老猶看夾注書二聯皆佳

李伯紀丞相過海絕句云假使黑風漂蕩去不妨乘興



訪蓬萊與坡公九死南荒吾不恨茲遊奇絕冠平生之  
句殆相伯仲異乎李文饒盧多遜窮愁無聊之作矣  
鄉相陳魏公去位詩云病深老迫宜歸去莫作留侯范  
蠡看時公年五十四而其言如此

艾軒讀江西詩云神仙本自無言說尸解由來最下方  
山谷與坡公云只欠小蠻樊素在我知造物愛公深屏  
山問李漢老病云欲袖雲門竹篋子室中驅出散花人  
愛朋友之言也白公云病與樂天相伴住春同樊子一

時歸放翁云九十老農緣底健一生強半是單栖自愛  
之言也

陳邦彥以金陵降敵游士或題其先壟云牙郎一去杳  
無蹤惟有青青夾逕松若使人能全此操松應合受大  
夫封其家執而訟於郡某守餉士人酒遣去牙郎用唐  
人賣國語

范石湖賞海棠云憶向宣華夜倚闌花光妍煖月光寒  
如今蹋颯嫌風露且只銅瓶滿插看宣華玉蜀宮名

也

蕭千巖機杼與誠齋同但才慳於誠齋而思加苦亦一  
生屯蹇之驗同時獨誠齋獎重以配范石湖尤遂初陸  
放翁而放翁絕無一字及之今摘其律帖精詣不甚費

研尋者於此 著語能奇怪呼天與倡酬

中秋

疾走建

德國乃為淵明先失脚墮榛莽劉伶扶我還

和陶

乾坤

生長我貧病怨尤誰

湘妃危立凍蛟背海月冷掛珊瑚

瑚枝醜怪驚人能嫵媚斷魂只有曉寒知百千年蘇著

枯樹一兩點春供老枝絕壁笛聲那得到直愁斜日凍

蜂知

古梅  
二絕

造物巧能相補得破慳賒與一天秋

山中  
六月

頓涼

一筇時到崔嵬上有底勲勞得給扶 秋浩蕩

中遙指點一螺許是定王城

湘渡

稚子推窗窺過雁

數峯乘隙入西軒 眼冷寒梢明數點知他是雪是

梅花 秋陽直為田家計饒得漁村一抹紅真誠齋敵

手也

故參與龔公行役過一山有老木參天再過其山童矣

居人云巨室以此造屋公記以絕句云千章古木轉頭  
空去與人間作棟隆未必真能庇寒士不如留此貯清  
風晦翁後見此詩嘆曰此龔公一生詩識意謂公初為  
諫官負重名晚不必為執政也

黃芻季野名士也既登第夢婦人素服扇上題云恨君  
青袖短悞妾白羅妝季野遂不肯婚余大父著作與之  
友善責以嗣續大義陳魏公素重其人以聶夫人女弟  
歸之既娶宛然夢中所見者季野果天無子大父葬之

於吾家祖塋

李雁湖悼亡云一杯漫道愁能遣幾度醒來錯喚君然  
元稹已云怪來醒後傍人泣醉裏時時錯問君此猶是  
暗合若四靈唐碑入宋稀與唐人隋柳入唐踈之句則  
是明犯

安晚丞相昭君詩云解移尤物柔強敵延壽當年合議  
功意新而理長

杭相李文靖乞去題六和塔云經從塔下幾春秋每恨

無因到上頭今日始知高處險不如歸卧舊林丘

高續古題四聖觀云射熊館暗花扶扈下鵠池深柳拂  
舟極藻繪追琢之功二宋殆不能過晚兼都官題直舍  
云無詩如鄭谷有髮似馮唐亦警策

趙忠定當國招蔡季通不至猶坐趙黨謫死道州偽禁  
方巖朱文公題其墓云有宋西山先生蔡季通之墓章  
泉哭之云鵲叫春林辱贈詩雁迴湘浦忽傳悲蘭枯蕙  
死迷三楚雨暗烟昏礙九疑早日力辭公府檄暮年名

入黨人碑嗚呼季子延陵字不待饒詞行可知是時章  
泉句律如此宜為一世所宗晚年詩太坦率幾於鳳德  
之衰矣

趙南塘挽餘干相云樞前留素仗簾下進黃袍語簡而  
事該又云漢閣新圖迴秦箏舊曲長挽鞏仲至云萬卷  
非其崇單方或以封有無窮之味和韓仲止懷蹈中弟  
云黃臺瓜辭可憐美老根連蒂摘都稀風流遂至爾身  
盡衰病况堪吾道非少日禦棋豪索酒暮年絲竹泪沾



衣人生到此將何遣一卷南華坐掩扉立春云蒼規不  
與圓生智白髮惟添老在身絕句云我欲將君洞庭野  
斜河淡月聽雲和要眇之音也

端平初除拜一新趙南塘起散地掌內制元夕觴客客  
散家集有觀傀儡詩云酒闌有感牽絲戲也伴兒童看  
到明余謂康節遂令高卧人敬枕觀兒戲之句蓋局外  
旁觀者之言爾若同局而為此言似乎未可

南塘評蹈中詩文貌節奏似韋謝信有之至於慕先儒

而遐想挽名流以自近則居然懸隔南塘惜其未撥棄  
浮論可謂名言其豪心俠氣極力揩磨不盡不若南塘  
之近道也題會春院云草荒故苑幾春風尚想花開春  
樹紅欲問當時馬王事寂寥殘照野亭中寒食云人家  
插柳春將過時節澆松老未歸挽趙從善尚書云先朝  
懷族遠平世責人深皆於近體中有遠意

亡友臨川曾景建博學強記無所不通工詩有金陵百  
咏同泰寺云此身終屬侯丞相誰辦金錢贖帝歸澄心

堂紙云一幅降牋何用許價高緣寫宋文章荆公書堂  
云愁殺天津橋上客杜鵑聲裏兩眉攢皆峭拔有風骨  
其少作云九十日春晴意少一千年事亂時多佳句也  
曾景建送蔡季通赴貶云四海朱夫子徵君獨典刑青  
雲伯夷傳白首太玄經有客憐孤憤無人問獨醒瑤琴  
空鏤匣絃絕不堪聽其後景建亦坐詩禍謫春陵而卒  
建人朱復之字幾仲多才藝為詩有思致初夏云忽聽  
夏禽三五弄新紅突過石榴枝秋日云紅蕖老去羞明

鏡推讓朱榮上蓼梢趙紫芝一樹木犀供夜雨清香移  
在菊花枝之句尤覺工緻

黃天谷名春伯白玉蟾姓葛名長庚皆自言得道後死  
乃無它異二人頗涉文墨所至牆壁淋漓揮洒能聳動  
人谷有詩云半篙春水一簑烟抱月懷中枕斗眠說與  
時人休問我英雄迴首即神仙嘗訪蟾值其出題壁云  
怪訪怪怪不在茅君山來相待

侂胄既誅或託巢鳥以譏當時朝士云衆鳥不喜亦不

悲又復別尋高樹枝

范石湖座上客有談劉婕好事者公與客約賦詞游次  
公先成公不復作衆亦歛手游詞云暖靄烘晴籞鎖垂  
楊籠池罩閣萬絲千縷池上曉光分宿霧日近羣芳易  
吐尋並蒂欄邊凝竚不信釵頭雙鳳去奈寶刀被妾先  
留住天一笑萬花妬阿嬌好在金屋貯甚秋風易得蕭  
疎扇鸞塵汗一自昭陽宮閉後牆角土花無數况多病  
情傷幽素百花臺上空雨露望紅雲杳杳知何處天尺

五去無路次公字子明定夫諸孫禮部侍郎操之子詩  
詞皆工

疎明瘦直不受東皇識留取伴春應肯萬紅裏怎著得  
夜色何處笛曉寒無奈力若在壽陽宮院一點點有人  
惜王澡身甫落梅詞也身甫常為太常博士

潘物字庭堅落筆皆不凡有鐔津懷舊詞云怕見倚闌  
杆閣下溪聲閣外山空有舊時山共水前歡暮雨朝雲  
去不還想是躡飛鸞月下時時認珮環月又漸低霜又

下更闌折得梅花獨自看

余涉世齟齬每誦歐公平生名節為後生描畫畧盡之  
言輒為慨然晚逐於朝交遊皆掉臂去惟湯伯紀寄詩  
云唐朝空自貴宏詞科目何嘗得退之掌制徒聞誇子  
厚殘編僅見命敦詩堪嗟實錄無完傳太息淮西有後  
碑寄語莆田紫薇老文章蓋世例如斯余曰不足以當  
此詩然在西掖草制七十不止一首伯紀未之見爾

後村集卷十八

欽定四庫全書

集部

後村集卷二十九

詳校官庶吉士臣吳煇

主事臣呂雲棟覆勘

總校官進士臣朱鈐

校對官主事臣陳文樞

謄錄監生臣陳秉寧



欽定四庫全書

後村集卷十九

宋 劉克莊 撰

詩餘

哨遍

借坡公以盤谷序配歸來詞然陶詩既隱括入律韓序則未也暇日遊方氏龍山別

墅試效禪為之村主人刻之崖石云

勝處可宮平處可田泉土尤甘美深復深路圯住人稀  
有人兮盤旋於此送子歸是他隱居求志是要明主媒  
當世嗟此意誰論其言甚壯孔顏猶有遺旨大丈夫之

被遇於時入則坐廟朝出旗麾列屋名姬夾道武夫滿前  
才子噫有命存焉吾非惡此而逃之富貴人所欲如  
之何幸而致向茂樹堪休清泉可濯谷中別有間天地  
愛繪細於絲蕨甜似密采於山釣於水大丈夫不遇之  
所為唐處士依稀是吾師覺山林尊如朝市五侯門下  
賓客擾擾趨權勢嗟盤之樂誰爭子所占斷千秋萬歲  
呼僮秣馬更膏車便與君從此逝矣

六州歌頭

客贈  
牡丹

維摩病起兀坐等枯株  
清晨裏誰來問是文殊  
遣名姝奪盡羣芳色  
浴纔出醒初解  
千萬態嬌無力  
困相扶絕代佳人  
不入金張室  
却訪吾廬對茶鐺  
禪榻笑殺此翁  
矐珠髻金壺始肖渠  
憶承平日繁華事  
修成譜寫成圖  
竒絕甚歐陽  
記蔡公書古來無一  
自京華隔問姚魏  
竟何如多應是彩雲  
散劫灰餘野鹿  
銜將花去休迴首  
河洛丘墟謾傷春  
弔古夢繞漢唐都  
歌罷欹歎

賀新郎

吾少多奇節頗椰榆玉闕定遠壺頭新息一劍防身行  
萬里選甚南溟北極看塞雁銜來秋色不但禦棋夸妙  
手管城君亦自無勅敵終賈輩恐難匹酒腸詩胆新  
來窄向西風登高望遠亂山斜日安得良弓並快馬聊  
與諸公角力漫醉把闌干頻拍莫恨寒蟬離海晚待與  
君秉燭游今夕歡易買健難得

賀新郎

送陳倉部  
知真州

北望神州路試平章這場公事怎生分付記得太行山

百萬曾入宗爺駕，馭今把作握蛇騎。虎君去京東，豪傑  
喜想投戈下。拜真吾父談笑裏，定齊魯。兩河蕭瑟，惟  
狐兔問當年。祖生去後，有人來否？多少新亭揮淚客，誰  
夢中原塊土。美事業須由人做，應笑書生心胆怯。向車  
中閉置如新婦，空目送塞鴻去。

賀新郎

杜子昕  
凱歌

盡說番和漢，這琵琶依稀似曲。驀然絃斷作麼，一年來  
一度欺得南人技。短歎幾處城危如卵。元凱後身居玉

帳報君休作尋常看布嚴令運奇筭 開門決鬪雌雄  
判笑中宵奚車瓊屋獸驚禽散箇箇魏冠橫塵柄誰了  
君王此段也莫靠長江能限不論周郎并幼度便仲尼  
復起嗟微管馳露布築京觀

賀新郎

跋唐伯玉奏藁

宣引東華去似當年文皇親擢馬周徒步殿上風霜生  
白簡下殿扁舟已具怎不與官家留住古有一言腰相  
印誰教他滿篋嬰鱗疏還笏退不回顧 新來邊報猶

飛羽問誰公可無長策少寬明主攀檻朱雲頭雪白流  
落如今底處但一片丹心如故賴有越臺堪眺望那中  
原莫已平安否風色惡天香暮

賀新郎

送唐伯玉還朝

驛騎聯翩至道臺家籌邊方急酒行姑止作麼携將琴  
鶴去不管州人墮淚富與貴平生無味可但紅塵難著  
脚便山林未有安身地搔白髮兀相對前身小范疑  
公是憶當年天章閣上建明尤偉慶厯諸賢方得路便

不容他老子須著放延州城裏一句殷勤牢記取在朝廷最好圖西事何必向玉關外

賀新郎

送黃成父還朝

飛詔從天下道中朝名流欲盡君王思賈時事祇今堪痛哭未可徐徐俟駕好著手扶將宗社多少法筵龍象衆聽靈山囑付些兒話千百世要傳寫子方行矣乘驄馬又送它江南太史去游瓊廈老我伴身惟有影倚徧風軒月榭悵玉手何時重把君向柳邊花底問看貞



元朝士誰存者桃滿觀幾開謝

賀新郎

戊戌壽張使君  
九月十八日

南國秋容晚曉寒輕芙蓉臺榭拒霜池館試向壺山堂  
上望萬頃黃雲刈遍總喫著君侯方寸不要漢庭誇擊  
斷要史家編入循良傳春脚到福星現家家香火人  
人願要還它慶元狨座建炎蟬冕穩奉安輿迎兩國誰  
謂山遙水遠福壽比河沙難篋來歲而今黃花節早驂  
鸞入侍瑤池宴風浩蕩梅清淺

賀新郎

端午

深院榴花吐。畫簾開。綵衣紈扇。午風清暑。兒女紛紛夸  
結束。新樣釵符艾虎。早已有。游人觀渡。老大逢場慵作  
戲。任陌頭年少爭旗鼓。溪雨急。浪花舞。靈均標致高  
如許。憶生平。既紉蘭佩。更懷椒糈。誰信騷魂千載後。波  
底垂涎角黍。又說是。蛟饒龍怒。把似而今醒到了。料當  
年。醉死差無苦。聊一笑。弔千古。

賀新郎

九日

湛湛長空黑更那堪斜風細雨亂愁如織老眼平生空  
四海賴有高樓百尺看浩蕩千崖秋色白髮書生神州  
淚儘淒涼不向牛山滴追往事去無迹少年自負凌  
雲筆到而今春華落盡滿懷蕭瑟常恨世人新意少愛  
說南朝狂客把破帽年年拈出若對黃花孤負酒怕黃  
花也笑人岑寂鴻北去日西匿

賀新郎

寄題聶侍  
郎鬱孤臺

絕頂規危榭跨高寒鳥飛不過雲生其下片斷無聲人

按堵翕忽青紅變化覽城郭山川如畫閣老鳳樓修造  
手笑談間突出凌雲厦臺上景買無價唾壺塵尾登  
臨暇似當年滌陽太守歐陽公也傾倒贛江供硯滴判  
斷雪天月夜更喚取鄒枚司馬銅雀凌歊歌舞散訪殘  
碑斷甃無存者餘翰墨被風雅

賀新郎

動地東風起畫橋西遶溪桑柘漫山桃李寂寂牆陰蒼  
蘚逕猶印前回屐齒驚歲月飈馳雲駛太息攀翻亭長

樹是先生手種今如此君不樂欲何俟  
傍人錯會淵明意笑斯翁皇皇汲汲登山臨水佳處徑呼籃輿去髣髴柴桑栗里從我者門生兒子嘗試平章先賢傳屈原醒不似劉伶醉判酌酹卧花底

賀新郎

宋卷  
訪梅

鵲報千林喜還猛醒謝家池館早寒天氣要與瑤姬叙離索草草杯盤藉地減盡何郎才思不願玉堂並金屋願年年歲歲花間醉餐秀色挹高致西園飛蓋東山

妓問何如半山雪裏孤山煙外管甚夜深風露冷人與  
長併共睡任翠羽枝頭多事老子平生無他過為梅花  
受取風流罪簪白髮莫教墜

賀新郎

溪上收殘雨倚畫欄薄綿乍脫日陰亭午鬧市不知春  
色處散在荒園廢墅漸小白長紅無數客子雖非河陽  
令也隨緣暫作鶯花主那可負甕中醕碧雲四合千  
巖暮恨匆匆余方有事子姑歸去趁取羣芳未搖落暇

日提魚就煮，歎激電光陰如許。回首明年何處，在問桃花尚記劉郎否。公莫笑醉中語。

賀新郎

和人咏  
茶蘼

曾與瑤姬約，恍相逢。翠裳搖曳珠璣，繚絡風雲青冥非。人世攬結玉龍驂，鶴愛萬朶千條，纖弱禱祝花神，憐惜取到開時，晴雨須斟酌。枝上雪莫銷却。惱人匹似中狂藥，凭危欄燭光交映，樂聲遙作。身上春衫香薰透，看到參橫月落。筭茉莉猶低一著，坐有緱山玉郎子，倚玉

卷十九  
簫度曲難為酢君不飲鑄成錯

賀新郎

用前韻賦  
黃茶蘼

想赴瑤池約向東風名姬駿馬翠韉金絡太液池邊羣  
鵠下又似南樓呼鶴畫不就穠纖嬌弱羅帕封香來天  
上瀉銅盤沉瀝供清酌春去也被留却芳魂再反應  
無藥似詩詠綠衣黃裏感傷而作愛惜尚嫌蜂採去何  
况流鶯蹴落且放下珠簾遮著除却江南黃九外有何  
人敢與花酌酢君認取莫教錯



賀新郎

再用  
約字

淺把宮黃約細端詳  
普陀煙裏金身珠絡  
萼綠華輕羅鞞  
小飛下祥雲仙鶴  
朶朶賽蜂腰纖弱  
已被色香撩病思  
儘鵝兒酒美無多酌  
看不足怕殘却  
人間難得傷春藥  
更枝頭流鶯喚起  
少年狂作留取姚家  
花相伴羞與萬紅同  
落未肯讓蠟梅先著  
樂府今無黃絹手  
問斯人清唱何人  
酢休草草認題錯

賀新郎

客贈  
芍藥

一夢揚州事畫堂深金瓶萬朶元戎高會座上祥雲層  
層起不減洛中姚魏歎別後關山迢遞國色天香何處  
在想東風猶憶狂書記驚歲月一彈指 數枝清曉煩  
馳騎向小窻依稀重見蕪城佳麗料得花憐儂銷瘦儂  
亦憐花憔悴漫悵望竹西歌吹老矣應無騎鶴日但春  
衫點點當時淚那更有舊情味

賀新郎

郡宴  
和韻

草草池亭宴又何須珠講絡臂琵琶遮面賓主一時詞

翰手倏忽龍蛇滿案傳寫處塵飛鶯囀但得平時魚稻  
熟這腐儒不用青精飯陰霧掃霽華見使君償了豐  
年願便從今也無敲朴也無厨傳試拂籠紗看壁記幾  
箇標名渠觀想九牧聞風爭羨此老飽知民疾苦早歸  
來載筆薰風殿詩有諷賦無勸

賀新郎

再和前韻

夢斷釣天宴怪人間曲吹別調局翻新面不是先生瘡  
啞了怕殺烏臺舊案但掩耳蟬嘶禽囀老去把茅依地

主有瓦盆盛酒荷包飯停造請免朝見  
少狂誤發功名願苦貪他生前死後美官佳傳白髮歸來還自笑管  
轄希夷古觀看一道冰銜堪羨妃子將軍慎未已問匡  
山何似金鑾殿休更待杜鵑勸

賀新郎

題蒲澗寺

風露驅炎毒記仙翁飄然謫墮吹笙騎鵠歷歷漢初秦  
季事山下瓜猶未熟過眼見羣雄分鹿想得拂衣游汗  
漫試回頭劉項俱蠻觸斫鯨鱠脯鱗肉  
越人好事因

成俗擁遨頭如雲士女山南山北問訊先生無恙否齊  
魯干戈滿目且遊戲扶胥黃木不是世無瓜樣棗便有  
來肯飽痴兒腹聊舉酒笑相屬

賀新郎

王實之喜予出嶺命愛姬  
歌新詞以相勞輒次其韻

此腹元空洞少年時諸公過矣上天吹送老大被他禁  
害殺身與浮名孰重這鼓笛休休拈弄綵筆擲還殘錦  
去用江淹  
鮑昭事願今生來世無妖夢且飯犢莫吞鳳 新來

喑啞如翁仲羨王郎驂鸞縹緲玉簫吹動應笑夔州村

裏女灸面生愁進奉要絕代傾城安用今古何人知此  
理有吾家酒德先生頌三萬卷謾充棟

賀新郎

蒙恩主崇禧  
再用前韻

主判茅君洞有簷前查查喜鵲曉來傳送幾度黃符披  
戴了此度君恩越重

僕五任祠廟一南岳二仙  
都三玉局四雲臺五崇禧

被賀監

天隨調弄做取散人千百歲笑渠儂一霎邯鄲夢歌而  
過鳳兮鳳 灌園織屨希陳仲問先生加齊卿相可無  
心動除却醴泉中太乙揀箇名山自奉那捷徑輸它藏

棟  
用有耳不曾聞黜陟免教人貶駁徂徠頌服蘭佩結茅

賀新郎 三和

謫下神清洞更遭它椰榆黠鬼路旁遮送薄命書生雞  
肋爾却笑尊拳忒重破故紙誰教繙弄一枕茅簷春睡  
美便周公大聖何須夢門前客任題鳳 卜隣羊仲并  
求仲願春來西疇雨足土膏犁動白髮巡官占歲稔不  
問京房翼奉棹與甕從今無用醉與老農同擊壤莫隨

人投獻嘉禾頌在陋巷勝華棟

賀新郎

席上聞  
歌有感

妾出於微賤少年時朱絃彈絕玉笙吹遍粗識國風關  
雎亂羞學流鶯百轉總不涉閨情春怨誰向西隣公子  
說要珠鞍迎入梨花院身未動意先懶 主家十二樓  
連苑那人人靚妝按曲綉簾初卷道是華堂簫管含笑  
殺街坊拍板回首望侯門天遠我有平生離鶯操頗哀  
而不愠微而婉聊一奏更三嘆



賀新郎

生日用實  
之來韻

鬢雪今千縷更休休痴心默望故人明主晚學瞿聃無  
所得不解飛昇滅度俟曉鼓夔夔過五散盡朝來湯餅  
客且烹雞要飯茅容母怕回首太行路 麟臺學士微  
雲句便尊前周郎復出審音無誤安得春鶯雪兒輩輕  
拍紅牙按舞也莫笑儂家蠻語老去山歌尤協律又何  
須手筆如燕許援琴操促箏柱

賀新郎

再用  
前韻

放逐身縑縷被門前羣鷗戲狎見推盟主若把士師三  
黜比老子多他兩度袖手看名場呼五不會車邊望塵  
拜免它年青史修潘母勾曲洞是歸路平生怕道蕭  
蕭句况新來冠欵弁側醉人多誤管甚是非並禮法頓  
足低昂起舞任百鳥喧啾春語欲托朱絃寫悲壯這琴  
心脉脉誰堪許君按拍我調柱

賀新郎

實之三和有憂邊  
之語走筆答之

國脉微如縷問長纓何時入手仰酬明主未必人間無

好漢誰與寬些尺度試看取當年韓五豈有穀城公付  
授也不干曾遇驪山母談笑起兩河路少時棋枰曾  
聯句歎而今登樓攬鏡事機頻誤聞說北風吹面急邊  
上衝梯屢舞君莫道投鞭虛語自古一賢能制難有金  
湯便可無張許快投筆莫題柱

賀新郎

四用縷字韻  
為王實之壽

萬宇如鍼縷憶王郎丹墀大對氣為文主貴近旁觀俱  
失色仰止如天聖度笑杜牧成名居五晚面清光猶苦

諫似封人懇切言君母謫塵世錯行路  
當時宜和薰  
風句又那知青雲一跌被才名誤輸與靈和殿前柳柔  
軟隨風學舞怪兩鳥新來停語不是先生高索價問何  
時宰相先生許舉杯祝莫傾柱

賀新郎

實之用前韻為  
老者壽戲答

身畔無絲縷但從前練裳練悅做他家主甲子一周加  
二紀兔走烏飛幾度賽孔子如來三五

徐陵云小如來  
五歲多孔子三

年  
鶴髮蕭蕭無可截要一杯

闕

慙陶母門外草欲迷

路 朗吟白雪陽春句待夫君驪駒不至鶴聲還誤老  
去聊攀萊子例倒著斑衣戲舞記田舍火爐頭語肘後  
黃金腰下印有高堂未敢將身許且扇枕莫倚柱

沁園春

夢方  
孚若

何處相逢登寶釵樓訪銅雀臺喚厨人斫就東溟鯨膾  
圍人呈罷西極龍媒天下英雄使君與操餘子誰堪共  
酒杯車千兩載燕南趙北劍客奇才 飲酣鼻息如雷  
誰信被晨雞輕喚回嘆年光過盡功名未立書生老去

機會方來使李將軍遇高皇帝萬戶侯何足道哉披衣  
起但淒涼感舊忼慨生哀

沁園春

送孫季蕃甲  
方漕西歸

歲暮天寒一劔飄然幅巾布裘儘緣雲鳥道躋攀絕頂  
拍天鯨浸笑傲中流疇昔竒君紫髯鐵面生子當如孫  
仲謀爭知道向中年猶未建節封侯南來萬里何求  
因感慨橋公成遠遊嘆名姬駿馬都成昨夢隻雞斗酒  
誰弔新丘天地無情功名有命千古英雄只麼休平生

客獨羊曇一箇灑淚西州

沁園春

送包尉

我羨君歸一路秋風芙蓉木犀想慈顏望久靈烏乍噪新  
眉畫就郎馬頻嘶忙脫征衫快呼斗酒細為家人說建  
谿爭知道這中年懷抱最怕分攜 丈夫南北東西應  
笑殺離筵粉淚啼悵佳人來未碧雲冉冉王孫去後芳  
草萋萋明日相思山重水複古道人稀茅店雞元龍老  
有高樓百尺誰共登梯

沁園春

答九華  
葉賢良

一卷陰符二石硬弓百斤寶刀更玉花驄噴鳴鞭電抹  
烏絲欄展醉墨龍跳牛角書生虬鬚豪客談笑皆堪折  
簡招依稀記曾請纓繫粵草檄征遼 當年目視雲霄  
誰信道淒涼今折腰悵燕然未勒南歸草草長安不見  
北望迢迢老去胸中有此磊砢歌罷猶須著酒澆休休  
也但帽邊鬢改鏡裏顏凋

沁園春

同前



我夢見君戴飛霞冠著宮錦袍與牧之高會齊山詩酒  
謫仙同載采石風濤萬卷星羅千篇電掃肯學窮兒事  
楚騷掀髯嘯有魚龍鼓舞狐兔悲嗥英雄埋沒蓬蒿  
誰摸索當年劉與曹嘆事機易失功名難偶誅茅西崦  
種秫東臯柵有雞豚庭無羔雁道是先生索價高人間  
窄待相期海上共摘蟠桃

沁園春

癸卯佛生翼日將曉夢  
中作既醒但易數字

有箇頭陀形等枯株心猶死灰幸春山筍賤無人爭吃

夜爐芋美與客同煨何處播花忽相導引莫是諸天迎  
赴齋又疑道向毗耶城裏講席初開 這邊尚自徘徊  
笑那裏紛紛早見猜有尊神奮杵拳麓似鉢名緇豎拂  
唱猛如雷老子無能山僧不會誰誤檀那舉請哉山中  
去便百千億劫休下山來

沁園春

和吳尚書叔永

我所思兮延陵季子別來九春笑是非浮論白衣蒼狗  
文章定價秋月華星獨步岷峨後身坡頰何必荀家有

二仁中朝裏看伯兮衰斧叔也絲綸 洛中曾識機雲  
記玉立堂堂九尺身歎苔溪漁艇幽人孤往雁山馬鬣  
弔客誰經宣室釐殘玄都花榭回首舊遊存幾人新腔  
美堪洗空恩怨喚起交情

沁園春

吳叔永尚書和  
予舊作再答

莫羨渠儂白玉成樓黃金築臺也不消顛怪騎麟被髮  
誰能委曲令鳩為媒髮有二毛袖閒雙手只了持螯與  
把盃公過矣賞陳登豪氣杜牧麁才 便煩問訊張雷

甚斗宿無光不重回想閣中鳴佩時攜客去壁間懸榻近  
有誰來撇我虎皮讓我牛耳誰道兩賢相危哉中年後  
向歌闌易感樂極生哀

沁園春

維揚作

遼鶴重來不見繁華只見凋殘甚都無人誦何郎詩句  
也無人報書記平安閭里俱非江山畧是縱有高樓莫  
倚闌沉吟處但螢飛草際雁起蘆間不辭露宿風餐  
怕萬里歸來雙鬢斑笑這邊贏得黑貂裘敝那邊輸了

翡翠衾寒檄草流傳吟牋倚閣開到瓊花亦懶看君記  
取向中州差樂塞地無歡

摸魚兒

怪新來倚樓看鏡清狂渾不如舊暮雲千里傷心處那  
更亂蟬踈柳凝望久愴故國百年陵闕誰回首功名大  
謬歎采藥名山讀書精舍此計幾時就 封侯事久矣  
輸人妙手滄洲聊作老叟高冠長劍渾閒物世上切身  
惟酒千載後君試看拔山扛鼎俱烏有英雄骨朽問顧

曲周郎而今還解來聽小詞否

摸魚兒

海棠

甚春來冷煙淒雨朝朝遲了芳信  
驀然作暖晴三日又  
覺萬株嬌困霜點髮潘令老年年不帶看花分才情減  
盡悵玉局飛仙石湖絕筆辜負這風韻  
傾城色懊惱  
佳人薄命牆頭岑寂誰問東風日暮無聊賴吹得臙脂  
成粉君細認花共酒古來二事天尤吝年光去迅謾綠  
葉成陰青苔滿地做取異時恨

摸魚兒

用實  
之韻

便披蓑荷鋤歸去何須身著宮錦與誰共話桑麻事朱  
老阮生尤稔篩樣餅甕樣醜長鬚赤髮供樵餼清流濁  
品盡掃去胸中置諸膜外對酒莫辭飲 華胥夢怕殺  
人驚曉枕踈窻惟月來闌一生常被弓旌誤且告朝家  
追寢愁箇甚君管取有薇堪采松堪蔭苑山再任幸不  
是謀臣又非世將免犯道家禁

一剪梅

袁州  
解印

陌上行人怪府公還是詩窮還是文窮下車上馬太匆  
匆來是春風去是秋風 階銜免得帶兵農嬉到昏鐘  
睡到齋鐘不消提嶽與知宮喚作山翁喚作溪翁

一剪梅

余赴廣東實之  
夜餞於風亭

東緼宵行十里強挑得詩囊拋了衣囊天寒路滑馬蹄  
僵元是王郎來送劉郎 酒酣耳熱說文章驚倒隣牆  
推倒胡牀傍觀拍手笑踈狂踈又何妨狂又何妨

滿庭芳

記夢



涼月如水素濤翻雪人世依約三更扁舟乘興莫記水  
雲程忽到一洲奇絕花無數多不知名渾疑是芙蓉城  
裏又似牡丹坪 蓬萊應不遠天風海浪滿目淒清更  
一聲鐵笛石裂龍驚回顧塵寰局促揮袂去散髮騎鯨  
蘧蘧覺元來是夢鍾動野雞鳴

鷓鴣天

腹疾困睡和  
朱希真詞

前度看花白髮郎平生痼疾是清狂幸然無事污青史  
省得教人奏赤章 遊俠窟少年場輸他羣謝與諸王

居人不識庚桑楚弟子誰從魏伯陽

鷓鴣天

戲題周登樂府

詩變齊梁體已澆香奩新製出唐朝紛紛競奏桑間曲  
寂寂誰知爨下焦揮綵筆展紅綃十分峭措稱妖嬈  
可憐才子如公瑾未有佳人敵小喬

卜筮子

惜海棠

盡是手成持合得天饒借風雨於花有底讎著意相陵  
藉做暖逼教開做冷催教謝不負明年花下人只負

栽花者

卜筭子 同前

片片蝶衣輕點點猩紅小道是天公不惜花百種千般  
巧朝見樹頭繁暮見枝頭少道是天公果惜花雨洗  
風吹了

卜筭子

亂似盎中絲密似風中絮行遍茫茫禹迹來底是無愁  
處好客挽難留俗事推難去惟有翻身入醉鄉愁欲

來無路

後村集卷十九

欽定四庫全書

後村集卷二十

宋 劉克莊 撰

詩餘

滿江紅

金甲瑠戈記當日，轅門初立。磨盾鼻，一揮千紙。龍蛇猶濕，鐵馬曉嘶。營壁冷，樓船夜渡。風濤急，有誰憐，援臂故將軍。無功級。平戎策，從軍什。零落盡，慵收拾。把茶經香傳，時時溫習。生怕客談榆塞事，且教兒誦花間集。嘆

臣之壯也不如人今何及

滿江紅

二月二十四日夜  
飲海棠花下作

老子年來頗自許心腸鐵石尚一點消磨未盡愛花成  
癖懊惱每嫌寒勒住丁寧莫被晴烘拆奈暄風烈日太  
無情如何得張畫燭頻頻惜憑素手輕輕摘更幾番  
雨過彩雲無迹今夕不來花下飲明朝空向枝頭覓對  
殘紅滿院杜鵑啼添愁寂

滿江紅

題梅  
谷

赤日黃埃夢不到清溪翠麓空  
健羨君家別墅幾株幽  
獨骨冷肌清偏要月天寒日暮尤宜竹  
想主人杖履繞  
千迴山南北  
寧委澗嫌金屋寧映水羞銀燭  
歎出羣  
風韻背時裝束競愛東隣姬傅粉  
誰憐空谷人如玉  
笑  
林逋何遜謾為詩無人讀

滿江紅

送宋惠父  
入江西幕

滿腹詩書餘事到穰苴兵法新受了  
烏公書幣著鞭垂  
發黃紙紅旗喧道路  
黑風青草空巢穴  
向幼安宣子頂

頭行方奇特 谿峒事聽儂說 龔遂外無長策 便獻俘  
非勇納降非怯帳 下健兒休盡銳 草間赤子俱求活 到  
崆峒快寄凱歌來 寬離別

滿江紅

落日登樓誰管領 倦游狂客 待喚起 滄浪漁父 隔江吹  
笛 看水看山 身尚健 憂晴憂雨 頭先白 對暮雲 不見美  
人來 遙天碧 山中鶴 應相憶 沙上鷺 渾相識 想石田  
茅屋 草深三尺 空有鬢如潘騎省 斷無面見陶彭澤 便



倒傾海水浣衣塵難滌

滿江紅

送王實之

天壤王郎數人物方今第一談笑裏風霆驚座雲煙生  
筆落落元龍湖海氣琅琅董相天人策問如何十載尚  
青衫諸侯客易愛底些官職難保底些名節擬閉門  
投轄劇談三日疇昔評君天下寶當為天下蒼生惜向  
臨分慷慨出商聲推金石

滿江紅

壽王實之

鶴馭來時長占定一年清絕九萬里纖雲收盡帝青空  
潤月露偏為丹桂地風霜欲放黃花節聽玉笙縹緲度  
緱山吹初徹 曾直把龍鱗批曾戲取鯨牙拔向絳河  
濯足咸池晞髮俗子底量吾輩事天仙不在臞儒列世  
豈無瑤草與蟠桃堪攀掇

滿江紅

和王實之  
韻送伯昌

怪雨盲風留不住江邊行色煩問訊冥鴻高士釣鼇詞  
客千百年傳吾輩話二三子繫斯文脉聽王郎一曲玉

簫聲淒金石  
晞髮處怡山碧垂釣處滄溟白笑而今  
拙宦它年遺直只願長留相見面未宜輕屈平生膝有  
狂談欲吐且休休驚鄰壁

滿江紅

四首並  
和實之

往日封章曾聳動君王玉色今似得三閭公子四明狂  
客古不能箝言者口天方欲壽中朝脉筭人間豈有病  
無醫須鍼石  
年冉冉袍猶碧心耿耿頭先白笑臣舒  
迂緩臣山愚直拂袖歸來羞執手望塵拜了難伸膝把

富春瀨與首陽山圖齋壁

滿江紅

三黜歸來飯蔬食渾無愠色中年後家如旅舍身如行  
客冕軒豈非疣贅具煙霞已是膏肓脉有些兒隙地更  
疏泉堆卷石鄰媪餉新芻碧溪友賣鮮鱗白向陳編  
吟笑孔明元直俗事不教污兩耳燕居聊可盤雙膝取  
當年行脚一枝筇懸高壁

滿江紅

疇昔臚傳仗下奏祥雲五色何況是西山弟子鶴山賓  
客上帝照臨忠義膽老師付受文章脉問此君髣髴似  
何人徂徠石 園官菜登盤碧田舍米翻匙白懶投書  
見素寄書杓直德耀不嫌為隱髻龜兒已解搖吟膝有  
誰憐給札老相如家徒壁

滿江紅

不見西山料它日面無慙色君記取不為呂黨亦非秦  
客檜有十客有意挽回當世事無方延得諸賢脉笑海波渺

渺幾時平空銜石 園五畝紛紅碧家四世傳清白任  
天孫笑拙女嬃嫌直老去何煩援以手向來不要加諸  
膝待深山深處著茅齋看青壁

滿江紅

壽唐夫人

八十加三人盡訝還童返少爭信道夜春曉織總曾經  
了凜凜共姜當日誓諄諄孟母平生教到如今象服擁  
魚軒天之報 如船藕如瓜棗斑衣舞金鍾醮望秋宵  
一點老人星照塵世少如孃福壽上蒼知得兒忠孝待

看它孫子又生孫添懷抱

滿江紅

和吳叔永尚書  
時吳喪少子

著破青鞵渾不憶蹋它龍尾更冷笑痴人擘畫二三百  
歲殤子彭籤誰壽夭靈均漁父爭醒醉向江天極目羨  
禽魚悠然矣 杯中物姑停止牀頭易都拋廢慨事常  
八九不如人意白雪調高猶協律落霞語好好終傷綺待  
煩公老手一摩挲文公記

風入松

福清道  
中作

橐泉夢斷夜初長別館淒涼細思二十年中事歎人琴  
已矣俱亡改盡潘郎鬢髮銷殘荀令衣香 多年布被  
冷如霜到處同牀簫聲一去無消息但回首天海茫茫  
舊日風煙草樹而今總斷人腸

風入松

同前

歸鞍尚欲小徘徊逆境難排人言酒是銷愁物奈病餘  
孤負金罍簫瑟搗衣時候淒涼鼓缶情懷 遠林搖落  
晚風哀野店猶開多情惟是燈前影伴此翁同去同來



逆旅主人相問今回老似前回

風入松

癸卯至石塘追  
和十五年前韻

殘更難睡抵年長  
曉月淒涼芙蓉院落深深閉  
歎芳卿  
今在今亡絕筆無求凰曲  
痴心有返魂香  
起來休鑷鬢  
邊霜半被堆牀定  
歸兜率蓬萊去  
奈人間無路茫茫  
緣斷謾三彈指  
憂來欲九迴腸

風入松

同前

攀翻宰樹暫徘徊  
草草安排昔人徒步陳雞絮  
愧公家

僕馬飭疊華表舊愁滿目黃梁殘夢傷懷 欲將莊列  
等歡哀對卷慵開憑高指點虛無路問何年遼鶴歸來  
宿酒得風漸解小興待月同迴

水龍吟二首

己亥  
自壽

年年歲歲今朝左弧懸罷渾無事吾衰久矣我辰安在  
老之將至懶寫京書怕看除目敗人佳思把東籬掩定  
北窗開了悠然酌頽然睡 客有過門投贄道先生訪  
華胥氏誰能辛苦陪他綺語記它竒字屈指先賢戴花

老監豈其苗裔待異時約取寬夫彥國入耆英會

先生放逐方歸不如前輩抽身早人來叩問臺郎舊秩  
散人新號起舞非狂行吟非怨高眠非傲嘆終南捷徑  
太行盤谷用卿法從吾好閉了草廬長嘯後將軍來  
時休報牀頭書在古人出處今人非笑製箇閒詞呷些  
薄酒野花簪帽願雲臺任滿又還因任賽汾陽考

水龍吟二首

自和  
前韻

病翁一榻蕭然

劉屏山  
號病翁

不知世有歡娛事雀羅庭院載

醪客去催租人至報答秋光要些酒量要些詩思奈長  
鯨罷吸寒蛩息響茶甌外惟貪睡 窮巷幸無干贖或  
相遇莫知誰氏柴門草戶闕人守舍任伊題字自和山  
歌國風之變離騷之裔待從今去願年年強健插花高  
會

平生酷愛淵明偶然一出歸來早題詩信意也書甲子  
也書年號陶侃孫兒孟嘉甥子疑狂疑傲與柴桑樵牧  
斜川魚鳥同盟後歸于好 除了登臨吟嘯事如天莫

想諮報田園閒靜市朝翻覆回頭堪笑節物催人東籬  
把菊西風吹帽做先生處士一生一世不論資考

浪淘沙

紙帳素屏遮全似僧家無端霜月闌牕紗喚起玉關征  
戍夢幾疊寒笳歲晚客天涯短髮蒼華今年衰似去  
年些詩酒新來俱倚閣孤負梅花

浪淘沙

疊嶂碧周遮遊子思家掩藏白髮賴烏紗落日倚樓千

萬恨社鼓城笳 老去淡生涯  
虛擲年華臘茶風味太  
清些待得痴兒公事畢謝了梅花

浪淘沙二首

丁未  
生日

去歲詣公車天語勤渠絳紗玉斧照寒儒恰似昔人曾  
夢到帝所清都 骨相太清臞謫墮須臾今年黃勒換  
稱呼只為此翁霜鬢禿老不中書

早歲類寒蛩晚節遭逢曾開黃卷侍重瞳歸去青藜光  
照牖堦藥翻紅 出畫頗匆匆主眷猶濃除官全似紫

陽翁

寶文  
漳州

換過新街頭面改又似包公

鄧郡得  
小龍

念奴嬌 木犀

遶籬尋菊菊猶遲  
舍北芙蓉渾未却是小山叢桂裏  
一夜花香飄墜  
約束奴兵  
丁寧稚子  
莫掃青苔  
砌風高露  
冷倚欄疑匪人世  
客有載酒過予  
朗吟招隱  
洗盡悲  
秋意白髮長官窮似虱  
剛被天公調戲  
遍地堆金滿空  
雨粟不濟淵明事  
殘英賸馥明朝猶可同醉

念奴嬌 菊

老夫白首尚兒嬉廢圃一番料平聲理餐飲落英并墜露  
重把離騷拈起野艷幽香深黃淺白占斷西風裏飛來  
雙蝶遶叢欲去還止 嘗試詮次羣芳梅花差可伯仲  
之間耳佛說諸天金色界未必莊嚴如此尚友靈均定  
交元亮結好天隨子籬邊坡下一杯聊泛霜蘂

念奴嬌

壬寅  
生日

比如去歲前年今朝差覺門庭靜玉軸錦標無一首知  
道先生遠佞假使文殊攜諸菩薩來問維摩病無花堪



散亦無香積齋襯 回首雪浪驚心黃茅過頂瘴毒如  
炊甑山鬼海神俱長者饒得書生窮命不慕飛仙不貪  
成佛不要鑽天今年今日白頭母子家慶

念奴嬌

壽方  
德潤

夕君來處與眉州仙子依稀同日一自前朝龔蔡俊頗  
覺壺山岑寂誰料端平繼居遺補復有斯人出幅巾林  
下姓名玉座長憶 須信諂語尤甘忠言最苦撇攬何  
如蜜諸老蕭疎星欲曉留取南都鐵壁洛社自佳鏡湖

雖好莫問君王乞年年歲歲大家同做真率

念奴嬌

丙午鄭少師生日

禁中張讌苦留公未許歸尋初服千載君臣魚有水不  
比嚴光文叔火德中天客星一夕草草聊同宿重來凝  
碧依然賡載相屬 過眼夸奮紛紛浮雲野馬幾度棋  
翻局客話鳳池三入事洗耳湖光一曲伯始泉荒穉珪  
圃冷占斷西風菊年年歲歲金英常泛芳醪

木蘭花慢

壽王實之

瀛洲真學士為底事在紅塵為語觸宮闈沈香亭裏嗔  
謫仙人為親近君側者見萬言策了忌劉蕡為是尚方  
請劍漢廷多憚朱雲君言往事勿重陳且鬪酒邊身  
也不會區區笑它甲子記甚庚寅爾曹譬如朝菌又安  
知老柏與靈椿世上榮華難保古來名節如新

木蘭花慢

癸卯  
生日

病翁將耳順牙齒落鬢毛疎也慙愧君恩放還田舍免  
詣公車兒時某丘某水到而今老矣可樵漁寶馬華軒

無分蹇驢破帽如初 浮名箕斗竟成虛磨折總因渠  
幸錫余佳號江湖聲叟山澤仙懼尊前未宜感慨猶須  
看歲晏何如衛武耄年作戒伏生九十傳書

木蘭花慢

送鄭伯昌

古人吾不見君莫是鄭當時更築就山房躬耕谷口名  
動京師諸公任他衮衮與杜陵野老共襟期有客至門  
先喜得錢沽酒何疑 昔年聯轡柳邊歸陳跡恍難追  
况種桃道士看花君子回首皆非相逢故人問訊道劉

郎老去久無詩把做一場春夢覺來莫要尋思

木蘭花慢

丁未  
中秋

水亭凝望久期不至擬還差隔翠幌銀屏新眉初畫半  
面猶遮須臾淡煙薄鶻被西風掃盡不留些失了白衣  
蒼狗奪回雪兔金蟾 乘雲徑到玉皇家人世鼓三搥  
試自判此生更堪幾度小住為佳何須如鉤似玦便相  
將只有半菱花莫遣素娥知道和他髮也蒼華

最高樓

戊戌  
自壽

南嶽後累任作祠官試說與君看仙都玉局纔交卸新  
銜又管華州山怪先生吟膽壯飲腸寬 去歲擁旌旗  
稱太守今歲帶笈箸稱漫叟慵入鬧慣投閒有時拂袖  
尋種放有時就枕親陳搏任傍人嘲潦倒笑痴頑

最高樓

再題周  
登樂府

周郎後直數到清真君莫是前身八音相應諧韶樂一  
聲未了落梁塵笑而今輕郢客重巴人 只少箇綠珠  
橫玉笛更少箇雪兒彈錦瑟欺賀晏壓黃秦可憐樵唱

并菱曲不逢御手與龍巾且醉眠蓬底月甕間春

臨江仙

滕州種花

落魄長官江海客少豪萬里尋春而今憔悴向溪濱斷  
無觴詠興惟有簿書塵手插海棠三百本等閒妝點  
芳辰他年絳雪映紅雲丁寧風與月記取種花人

臨江仙

庚子歲重陽余以漕攝帥觴唐伯玉前  
漕成父于越王臺明年是日寓海豐縣

驛作

去歲越王臺上飲席間二客如龍憑高弔古壯懷同馬

嘶千嶂暮樂奏半天中  
今歲三家村市裏故人各自  
西東菊花時節酒樽空  
可憐雙雪鬢禁得幾秋風

臨江仙

潮惠道中

不見仙湖能幾日塵沙變盡形容  
夜來月冷露華濃都  
忘茅屋下但記畫船中  
兩岸綠陰猶未合更須補竹  
添松最憐幾樹木芙蓉  
手栽纔數尺別後為誰紅

臨江仙

已酉和實之燈夕

玉笛鈿車當日事東塗西抹都曾等  
閒曲子壓和凝

曲子



相縱遊非草草已醉強惺惺  
公今向三家村送老身如  
罷講吳僧高樓百尺不須登  
半爐燒葉火一瓊勘書燈

昭君怨

牡丹

曾看洛陽舊譜只許姚黃獨步  
若比廣陵花太虧他  
舊日王侯園圃今日荆榛狐兔  
君莫說中州怕花愁

昭君怨

瓊花

后土宮中標韻天上人間一本道  
號玉真妃字瓊姬  
我與花曾半面流落天涯重見  
莫把玉簫吹怕驚飛

清平樂

五月十五  
夜玩月

纖雲掃迹萬頃玻璃色醉跨玉龍游八極歷歷天青海  
碧 水晶宮殿飄香羣仙方按霓裳消得幾多風露變  
教人世清涼

清平樂

同前

風高浪快萬里騎蟾背曾識嫦娥真體態素面元無粉  
黛 身游銀闕珠宮俯看積氣濛濛醉裏偶搖桂樹人  
間喚作涼風

清平樂

贈陳參議  
師文侍兒

宮腰束素只怕能輕舉好築避風臺護取莫遣鷺鴻飛  
去一團香玉溫柔笑顰俱有風流貧與蕭郎眉語不

知舞錯伊州

清平樂

丹陽舟  
中作

休彈別鶴淚與絃俱落歡事中年如水薄懷抱那堪作  
惡昨宵月露高樓今朝煙雨孤舟除是無身方了有  
身長是閒愁

長相思 惜梅

寒相催暖相催催了開時催謝時  
丁寧花放遲 角聲  
吹笛聲吹吹了南枝吹北枝  
明朝成雪飛

長相思 寄遠

朝有時暮有時潮水猶知日兩迴  
人生長別離 來有  
時去有時燕子猶知社後歸  
君行無定期

長相思 餞別

風瀟瀟雨瀟瀟相送津亭折柳條  
春愁不自聊 煙迢

迢水迢迢擬江邊駐畫撓舟人頻報潮

長相思

煙淒淒草淒淒野火原頭燒斷碑不知名姓誰  
印纍纍冪冪纍千萬人中幾箇歸榮華朝露晞

長相思

勸一杯復一杯短鋤相隨死便埋英雄安在哉  
眉不開懷不開幸有江邊舊釣臺拂衣歸去來

菩薩蠻

戲林推

小鬟解事高燒燭羣花圍繞擣蒲局道是五陵兒風騷  
滿肚皮 玉鞭鞭玉馬戲走章臺下笑殺灞橋翁騎驢  
風雪中

玉樓春

戲林推

年年躍馬長安市客舍似家家似寄青錢換酒日無何  
紅燭呼盧宵不寐 易挑錦婦機中字難得玉人心下  
事男兒西北有神州莫滴水西橋畔淚

生查子

元夕戲  
陳敬叟

繁燈奪霽華，戲鼓侵明發。  
物色舊時同，情味中年別。  
淺畫鏡中眉，深拜樓西月。  
人散市聲收，漸入愁時節。

憶秦娥

暮春

游人絕綠陰，滿野芳菲歇。  
芳菲歇，養蠶天氣采茶時節。  
枝頭杜宇啼成血，陌頭楊柳吹成雪。  
吹成雪，淡煙微雨江南三月。

憶秦娥

上巳

修禊節，晉人風味終然別。  
終然別，當時賓主至今清絕。

等閒寫就蘭亭帖豈知留與人間說  
人間說永和之  
歲暮春之月

憶秦娥

泥滑滑一聲聲喚征鞍發  
征鞍發客亭楊柳不禁攀折  
荀郎衣上香初歇  
蕭娘心下書難說  
書難說霎時吹  
散一生愁絕

憶秦娥

春醒薄夢中  
毬馬豪如昨  
豪如昨日明  
橫笛曉寒吹  
角



古來成敗難描摸而今却悔當時錯當時錯鐵衣猶  
在不堪重著

憶秦娥

梅謝了塞垣凍解鴻歸早鴻歸早憑伊問訊大梁遺老  
浙河西面邊聲悄淮河北去炊煙少炊煙少宣和宮  
殿冷煙衰草

鵲橋仙

戊戌  
生朝

金風浙浙銀河淡淡長少羣賢畢會平生心事麴生知

怪此夕惺惺相對  
玄花生眼新霜點  
鬢不肯遮藏老  
態人間何處有  
仙方擘劃得  
二三百歲

踏莎行

甲午重九  
牛山作

日月跳丸光陰脫兔  
登臨不用深懷古  
向來吹帽插花  
人盡隨殘照  
西風去  
老矣征衫飄然  
客路炊煙三兩  
人家住欲攜斗酒  
答秋光山深無覓  
黃花處

水調歌頭

遊蒲澗追和  
崔菊坡韻

余頃為儀真郡督郵白事無揚崔公銳欲羅  
致屬先受制置使李公之辟崔公使聘洪公

舜俞入幕後二十五年奉使嶺外拜公祠象  
俯仰今昔輒和公所作水調以寓悲慨之意  
云

敕使竟空返公不出梅關當年玉座記憶仄席問平安  
羽扇尉佗城上野服仙遊閣下遼鶴幾時還賴有蜀者  
舊健筆與書丹青油士珠履客各凋殘四方處處靡  
騁獨此尚寬閒丞相祠堂何處太傅石碑墮淚木老瀑  
泉寒往者不可作置酒且登山

再和喜歸

遣作嶺頭使似戍玉門關來時送者舉酒珍重祝身安  
街畔小兒拍笑馬上是翁矍鑠頭與壁俱還何處得仙  
訣髮白頰猶丹 屋茅破籬菊瘦架籤殘老夫自計甚  
審忙定不如閑客難揚雄拓落友笑王良來往面汗背  
芒寒再拜謝不敏早晚乞還山

三和

解印有  
期戲作

老子頗更事打透名利關百年擾擾于役何異入槐安  
夢裏偶然得意醒後纔堪發笑蟻穴駕車還恰佩南柯

印髻鬅鬢曾丹 客未散日初暝酒猶殘向來幻境安  
在回首總成閒莫問浮雲起滅且跨剛風遊戲露冷玉  
簫寒寄語抱樸子候我石樓山

四和

八月上浣解印  
別同官席上賦

半世慣歧路不怕唱陽關朝來印綬解去今夕枕初安  
莫是散場優孟又似下棚傀儡脫了戲衫還老去事多  
忘公莫笑師丹 筆端花冑中錦兩消殘江湖水草空  
曠何必養天閑久苦諸君共事更盡一杯別酒風夜深

寒回首行樂地明日隔雲山

五和

客散循堤  
步月而作

落日幾呼渡佳夕每留關有時來照清淺鬢雪似潘安  
一曲親蒙君賜兩岸更無人迹惟見鷺飛還隙地欠栽  
接蕉荔雜黃丹 柳全疎松尚幼怕摧殘傍人笑我痴  
計管鑰費防閑翁意在乎林壑客亦知夫水月滿腹貯  
清寒賦咏差有愧赤壁與滌山

六和

次夕鷓客湖  
上賦葛仙事

楚子問周鼎柱史出秦關苦求勾漏何意身世遠差安  
不見跼鸛墮水時有飛鴻遵渚樂此久忘還采藥偶然  
耳胸次有靈丹 釣游處榕葉暗荻花殘自仙翁後千  
載輸與水鷗閒我讀內篇未竟忽被急符驅去洞閉白  
雲寒回首愧幽子隱約海中山

七和

十三夜同官戴酒  
相別不見月作

怪事廣寒殿此夕不開闌林間烏鵲相賀暫得一枝安  
只在浮雲深處誰駕長風挾取明鏡忽飛還玉兔呼不

應難覓白中丹 酒行深歌聽徹笛吹殘嫦娥老去孤  
另離別匹如閒待得銀盤擎出只恐玉峯醉倒衰病不  
禁寒卿去我欲睡辜負此湖山

水調歌頭

癸卯中秋作

老去有奇事天放兩中秋使君飛榭千尺縹緲見麟洲  
景物東徐城上歲月北征詩裏圓缺幾時休俯仰慨今  
昔惟酒可澆愁 風露高河漢淡素光流賈人野老相  
慶田海十分收競看嫦娥金鏡爭信仙人玉斧費了一



番修衰晚筆無力誰伴賦黃樓



後村集卷二十